

清容居士集

附札記

四



清容居士集

附札記

(四)

袁 楠 撰

清容居士集卷第九

律詩 五言

次韻善之雜興七首

習隱漸成癖。苔光綠映扉。避名常好好。絕俗任非非。日落長鑱柄。天寒白苧衣。南鵬五月息。戢翼笑羣飛。萬事不滿笑。書林盡歲娛。未須夸得意。底用哭窮途。細雨看移竹。秋風學鱸鱸。百年真急景。醉入壁間壺。昔日登臨地。狂歌祇自求。漢宮空有恨。吳女不知愁。雲葉寒沙霽。江花古岸秋。何人持鐵板。敲徹舊邊樓。學道常無寐。披衣聽曉笳。精勤慕柏大。詭幻笑欒巴。丹熟抽金汞。窗明鍊玉沙。微陽端有候。一點應吹葭。善之近學參同契。故戲及之。

月黑

臥遊元不惡。佳處絕榮枯。雲憶東西寺。山看大小孤。行年須白社。失意付黃壚。何事遼東鶴。空悲景物殊。鄧子清如竹。蕭蕭澹世情。下帷鄰草色。倚杖愛松聲。嗜癖成書賈。身窮付筆耕。乘槎空有約。何日海邊城。書聲連古巷。疑是白雲廬。吟苦眠料理。塵深靜破除。詞華輕大曆。風雅近黃初。顧我相知舊。艱難愧不如。

次韻題林隱

移家鄰縣去。住久不知年。花擁檐前樹。泉歸澗下田。丹芽承露浴。石乳拾松煎。擬欲題新竹。才疎愧惠連。

次韻上官伯圭夜坐觀梅二首

愛酒嫌劇飲。天寒但欲眠。烏啼千樹外。雁過一燈前。霜角悲涼調。風幡自在禪。平生江海意。袖手送殘年。

題柯自牧救荒記

曾聞於越地。千里草青青。比屋呼庚癸。連年厄丙丁。已傳青社記。不用峴山銘。近說天台宅。新成太祝廳。

壽高舜元父二首

喜見黃鐘月。重推絳縣年。雪窗溫鼎火。春甕養壺天。朝市成真隱。階庭擁壽仙。時吟五字律。獨立晚風前。

打灘

老石太古色。避魚新水姿。輕冰養流汞。急瀑散飛碁。角力誰爲挽。臨流亦自移。南來多此意。北望莫相疑。

春陰

寂寂春陰半。南來未識花。故鄉憶寒食。細雨摘新茶。物色供詩句。風沙入鬢華。山林元未改。客路獨烏紗。

懷城南諸友二首

春至長爲客。愁多始憶君。風程江北路。水驛海東雲。杜宇深深怨。醅醪淡淡醺。行藏曾共數。不是故離羣。

養性深辭酒。全交淺作書。寧知故人厚。自愧後生疎。春入黃河道。雲分碧鳥居。江湖從浩蕩。不敢愛吾廬。

舟中雜書五首

野色連雲白。春聲引樹清。遊魚新浪急。歸鳥片帆輕。曉夢三千里。風餐第幾程。萍蓬元未穩。徙倚問天明。
挂席疎星外。停舟獨柳邊。團團風始陣。帖帖月初弦。隴曲沙成雪。吳歌水拍天。行藏有如此。把卷獨悠然。
春睡元無著。鄉心比酒醺。飛花空有意。小雨不成容。獨樹疑新堠。羣鴉似亂峯。艱難憐浩蕩。散髮遂初慵。
河落渾無底。飄零總客塵。春洲蘆雁少。曉戶柝蠶勻。京洛饒豐稔。江湖樂賤貧。低徊吾不恨。應有故山筠。
桑柘斜陽道。天然錦繡機。雲容催溽暑。花片憶春霏。水落新魚瘦。風清宿麥肥。歸程時屈指。重午試生衣。

淮浦

淮水奔如箭。舟維岸屢移。斷岡封馬鬣。落雁陣魚麗。白葦前朝界。青帘古戍基。亂離今已矣。風物漸熙熙。
立春日宿大清口舟中見新月二鼓雪作

春月如佳士。翩翩欲上船。相逢疑昨日。一別又新年。水鏡心胸朗。空輪體質全。更深飛雪急。直與鬪清妍。

次韻陳剛中待制初秋二首

碧樹晚雲餘。秋聲入客廬。知公吟蟋蟀。勸我憶鱸魚。宦味元無著。鄉心得未疎。清塵滿雙鬢。蕭瑟不禁梳。
岸幘倚書楹。寒砧徹四城。馬歸人獨語。雁過月初生。寂寂候蟲急。淒淒落葉清。客懷誰與共。搔首見參橫。

送牟元通歸瀘州

西州人物論。翁季擅清門。已暗金牛路。猶傳鐵騎孫。巴江雲不盡。蜀嶺雪空存。邂逅衣冠聚。艱難得共論。
夜夢作詩覺。因足後韻。

薄酒薄於水。濃山濃似春。梁間雙語燕。天外獨歸人。細柳千重緒。飛花一寸塵。碧窗初睡醒。新月寫清真。
淮陰大風

極目虛無裏。飄飄萬馬馳。飛蓬旋橐籥。虛谷應埧箴。春樹元無著。晴雲復自持。倚舟沙際穩。歸雁得相隨。
題溫州太守德政詩後

海郡炎歊重。涼風起素秋。飛蝗分界去。鳴鵲下陂遊。白布官租減。黃甘雅詠酬。兒童多好語。竹馬擁君留。
次韻馬伯庸春思兼簡繼學二首

洛花千萬朵。一一爲君開。粟暈排金縷。酥凝爛玉杯。美人乘馬至。仙子抱琴來。莫學飛紅似。隨風喚不迴。
行窩春匝匝。下榻望君來。雙玉矜嬌思。聯鑣騁逸才。題詩紅袖擁。傳詔錦袍迴。羞殺高眠者。楊花滿綠苔。
送秦巖卿從事出宰北平縣

高秋右北平。出宰樂時清。白水前朝界。黃雲舊塞城。彈琴看雁過。束帶候雞鳴。不盡平蕪際。題詩倚馬成。

黃河口

徐州城西北隅。與黃樓相衝。今從此南流。

河落流沙駛。茫茫禹甸周。昔聞傳北載。今已絕東流。俊鶻辭高下。輕鷗擅去留。百年文采盡。日落認黃樓。

徐中丞母八十

謝庭森玉樹。漢闕賜金花。懿德傳家盛。耆年舉世誇。晴萱當檻直。冬筍隔離斜。拭目諸孫秀。翩翩佩紫綃。

送張榮澤

斂板榮陽縣。栽花接早春。水新魚子散。雪釋馬蹄勻。政可箋河伯。何須詠洛神。桑田今幾許。除籍補疲民。

贈瑛上人住洞林

托鉢千巖裏。松花凍未開。哀猿依講席。飢鳥下生臺。潭影留雲定。鐘聲送月回。山中太古雪。爲寄一瓢來。

送周南翁集賢南歸省墓

搖曳十洲仙。來尋楚尾船。金花榮故里。石筍表新阡。江橘團霜重。冰魚鱸雪鮮。塔前雙玉好。行賦鹿鳴篇。潞公判永興。遊嵩之詩見於翰墨。然卒與右軍之遊汶。大率相類。名爲造物所忌。豈虛語哉。今見其孫璋甫佐西省。甘棠遺思。至是殆將見之。

渭水落葉盡。往來餘碧鷗。龍門七十里。雁塔一千秋。弔古麒麟塚。衝風驢驢裘。寒蕪明滅處。遮馬見君留。

劉氏集慶堂

華構出層林。春浮院宇深。小桃分雜佩。新燕掠鳴琴。石乳千年潤。松花百尺陰。紫皇方問道。那許遂歸心。

送蘇子寧和林郎中二首

貂帽護寒沙。冰天閱歲華。斷溪駝聽水。密雪犬行車。雲盡難尋雁。春深未識花。昔人奇絕處。八月解乘槎。往歲經遊地。寒蕪碧燐深。雲開山後陣。水咽隴頭吟。雪白氈房重。天青羽檄沈。重華新雨露。悲喜候車音。

蘇子寧北行詩二首

出塞黃雲盡。經春白雪多。高樓閒鼓角。絕域靜干戈。風急盤鵬嶺。冰深飲馬河。征鞍遲明發。揮手渭城歌。去去居庸道。關山冬氣深。雪天孤帳宿。寒月一笳吟。石堞棲鴉穩。沙場過雁沈。粉闌多暇日。歸騎有佳音。

吳閒閒病起二首

好客頻來往。閒雲管送迎。花香清病骨。松籟答書聲。身世三生夢。乾坤萬古情。故園多蕨筍。歸興繞江城。客散庭如水。春深日似年。閒心觀宇宙。浮世閱風煙。詩句吟難穩。蒲團坐欲穿。一聲松外鶴。此意共悠然。

題蔚州郭氏永寧亭

華亭絕市囂。山崦映岩嶸。落葉燃茶鼎。長松挂酒瓢。天低雲欲下。春盡雪初消。歲晚無王事。前村看射鵰。

次韻馬伯庸題淩波仙圖

玉衣朝岱日。寶瑟寫湘雲。宛轉鸞歸憶。參差雁過聞。石痕生左角。松影印迴紋。倚竹憐雙泣。攜蘭憫自焚。停驂沙磧近。指點認昭君。

伯庸以詩見屬次韻二首

學古陳言少。官清雅詠多。珠玕明玉海。寶鑑挹金波。易賴章編定。書疑汗簡訛。斯文今有託。爲我補嘉禾。聽君人物論。閱世似難多。學禮師倉海。傳家繼伏波。看山窮北戒。惜日愛南訛。彩鳳非無食。瓊山自有禾。

高掾祖父八十

心跡混漁樵。門深絕市囂。花前歌舊曲。燈下話先朝。白髮書千卷。朱顏酒一瓢。有孫遊玉署。從此樂逍遙。

長春道士禱雨有應

清夜轉崑崙。天雷卓午聞。平林千樹響。古澗百泉分。門靜堆黃葉。山空聳白雲。神功滿禾黍。尸坐答鍾熏。

次韻馬御史題漢州喻氏多勝亭

花壓金橋重。春風第一州。江喧朝灌口。雲擁護遨頭。雁落沙中渚。鵲啼竹外洲。使君燈火地。爲我倚高樓。

鶴山年少時守漢州。元夕張燈。金雁橋斷。

次韻伯庸過天寶宮

松暝碧雲深。鶴歸人倦尋。朝迴香滿室。祠罷月盈襟。白鳥分山影。黃鸝轉樹陰。小溪流不歇。咽咽似鳴琴。

送白誠之赴台州別駕

岩峩巾子峯。市近海潮通。桂樹團雲濕。松花帶露濃。猿隨僧屐雨。鷗送賈帆風。盡道無王事。持杯百過空。

贈瞿者

尸坐包玄象。虛窗萬籟沈。聽泉知地脈。候琯合天心。風定馬蹄急。霜清葉落深。弄丸端可學。從此罷鳴琴。

送成公履守光州

淮樹連空碧。淮山徹底清。濯纓羞戀闕。佩印樂專城。曬網雲催泊。提壺雨勸耕。地偏王事簡。數雁寫琴聲。

寄開元奎律師五首

開元古壇主。盡日着袈裟。社主勤供菜。天神罷送花。蒲團黃葉護。香鼎白雲遮。終歲無王事。繙經到日斜。
開元古壇主。老至律精嚴。洗鉢魚遊水。開門鶴入簾。拾薪供茗具。滴露寫經籤。已悟如來意。看花不用拈。
開元古壇主。身世兩相忘。客至常扃戶。僧來不下牀。神光千里鵲。玄辨九秋霜。白葉渾消盡。蓮池任意香。
開元古壇主。瓦石化丹青。似住元非住。無營類有營。念珠金的磔。戒鉢鐵晶瑩。我亦慙塵垢。清齋養性靈。
開元古壇主。幼歲已相聞。我竟飄京國。師方玩水雲。一官千日計。萬事五更分。共約修蓮社。空林洗垢盆。
髻鬢侍諸父。拜雙峯祠堂。未嘗敢有題詠。二十年來。接武于玉堂瀛洲。霜露之思。缺然有覲。近聞平
石長老興廢補仆。光紹前聞。遂述舊懷爲六詩。且申歎仰。

沈沈大士閣。千嶂萬夫降。近樹青禽獨。前松白鶴雙。雲霞生几席。星斗列軒窗。俛首京塵客。生涯愧老龐。
慚愧雙峯老。光明兩足尊。新牧釋迦佛像。午窗鈎竹影。凍筆點梅魂。齋近烏啼樹。禪迴虎伏門。春來有新雁。勸我
趣歸轅。

經院辛勤日。千金記始興。創寺時。以賜金千兩。經始。今八十有四年。雨荒蟲蝕拱。壁壞鼠緣藤。舊觀丹青復。諸天錦繡承。短簷
增突兀。會見出盧能。書來修選僧堂。舊有術士言。太高。稗沙門減其柱。然清班亦不聞有顯者。故未及之。

陰陰虞監宅。虞永宅。鬱鬱越公祠。掬水不入獻。布金猶受疑。流年翁仲守。往事蕊菑知。澗水交流處。曾傳玉
帶垂。

寒徹清泉底。山童上水華。定金非在井。羅喉羅尊者語。傳昔有羅喉子墜斂。其水遂定。煮米卻成沙。洗目能生電。搜腸可當茶。人

持一月去。此月落誰家。

跼蹐千樹暝。彈指百花春。道以東巖的。詩於北澗新。歸雲呈住相。行籜掃空塵。靈鷲誰公論。啼猿正惱人。

次韻張希孟凝雲石十詠

我愛凝雲好。神交萬化前。碧窗圍蜃氣。黑浪裊蛟涎。化石知何代。出山今幾年。相從清思長。寸穎起蒼煙。
我愛凝雲好。飛塵萬馬驅。雄深麾將士。峭直傲公孤。斷足鼈分極。摩牙虎負嵎。何年化霖雨。慎勿竟虛無。
我愛凝雲好。雍容諫諍姿。虛中超混沌。正色走窮奇。潤物非無意。成功自有時。棲遲元未晚。清坐愧神癡。
我愛凝雲好。氤氲萬象深。鎮浮廊廟體。閱靜雪霜心。屈曲蜂房綴。玲瓏蟻穴淫。玉京誇獨秀。此日汗腰金。
我愛凝雲好。朝昏境不同。金芽養靈谷。鐵網起晴空。月色古今正。潮痕子午中。點頭那有異。吾欲問生公。
我愛凝雲好。神清湛欲留。岷峨千古雪。泰華一天秋。獨鶴離羣皎。層冰出澗幽。無言有深抱。山立正陽休。
我愛凝雲好。模糊老墨仙。癡墓端食月。渴驥欲奔泉。守黑壺中日。談玄洞裏天。煙霞元自足。塵世未爲賢。
我愛凝雲好。翛然一榻棲。支機何物誕。醒酒此君低。香遠能爲霧。泉深解作溪。未須鄰綺角。端可比夷齊。
我愛凝雲好。能歸萬古春。遺簪三島客。椎髻八蠻臣。柏子添清供。梅花寫舊真。天心元不動。東海任揚塵。
我愛凝雲好。蒼龍擘硤飛。振纓悲濁垢。整珮謁清微。歲月江翻浪。冰霜玉韞暉。黃塵今幾許。且勿展書闥。

山水圖

樹重雲光溼。峯寒曉氣清。抱琴人欲往。門暗客相迎。凍雨生寒溜。深雲倚怪藤。蹇驢吟不得。指點墨千層。

淇綠堂

卜築荆溪下。碧陰生晝涼。軒昂丈人行。瀟灑此君鄉。月候綵山鶴。雲催嶰谷凰。衛風朝夕誦。底用別詞章。

寄砥長老

雙峯不受暑。傑閣稱幽禪。蕉葉綠雲扇。藤花白雪氈。見龍增澗水。喜雁點江天。笑我開平客。于今第幾年。

送李希白降香武當山

絕壁通靈籙。天香簇寶華。重明應龍馬。習坎伏龜蛇。度嶺金盤日。穿雲玉佩霞。道逢采苓叟。應與論南華。

送永新王東野還里

天際風花黑。燈前鬢影蒼。方刊肘後祕。金散橐中裝。某樹童年種。茲丘晚歲藏。已忘朝野事。飛鷺起鳴榔。

輞川圖

詩中傳畫意。畫裏見詩餘。山色無還有。雲光卷復舒。前溪漁父宿。舊宅梵王居。千古風流在。披圖儼起予。

贈雪窗上人

少日觀滄海。陰山恨未登。飢餐太古雪。渴飲萬年冰。柳色迷官道。鐘聲動客燈。聞聞與見見。問我一枝藤。

直沽口

二水赴滄海。客行殊未休。漁舟維病鶴。歸棹起輕鷗。雨重雲光溼。天低樹色浮。京塵今已洗。從此問菟裘。

三月廿九日阻風馮家口

飄泊春風怒。維舟古渡濱。防堤堆馬鬣。蹙浪捲龍鱗。撇掠吞吳陣。紛披障庾塵。柳陰亭午轉。人靜白鷗馴。

次韻劉明叟

欲知行路苦。孤雁促歸期。矮屋燈昏際。空林葉落時。滄浪誰欸乃。樵櫟笑吟癡。點檢韋囊裏。珠璣總屬詩。

壽閻承旨三十韻

寶曆書堯甲。蒼杓指夏辰。脩齡天保魯。嘉瑞嶽生申。人物中州正。陶鈞淑氣淳。舒晴翹孔翠。墮地擢麒麟。藻思傳髻綺。蜚聲起搢紳。文鋪崑玉鏤。賦約楚蘭紉。樂道車中聘。談經席上珍。飛牋油幕佐。執簡柏臺賓。黼黻開丹地。絲綸演紫宸。慶雲圖遠牒。甘澤洗荒塵。評論空餘子。儀刑倚重臣。昂昂霄漢表。皎皎雪霜身。滄海鷗忘慮。長風驥絕倫。名高諸彥避。德盛後生親。朗鑒中秋月。天和太古春。精忠言款款。獎引語諄諄。書葉題文債。詩筒破酒巡。筆翻金井凍。詞吐露桃新。格律常楊陋。篇章鮑謝鄰。辛勤憐我輩。銓賞屬斯人。南極呈黃道。東皇挾絳輪。霓旌紛旖旎。香鼎秀氤氲。果熟分金母。丹成養谷神。心澄眸轉碧。光瑩頰浮銀。物色歸青簡。年華閱大椿。小車花外影。馴鶴竹間真。賀履聯行整。傳觴捧勸頻。疎閒看遠岫。虛靜傲蒼筠。往事雲舒卷。流年肘屈伸。長生端可學。靈壽不須陳。

次韻仲章過陳氏城南書隱十韻

矮屋參差倚。平蕪黯淡看。夢迴榆塞遠。愁絕翠峯寒。白髮游絲罥。丹心古鏡蟠。槐明金瑣碎。菊鑄玉嶠巉。憶月時看劍。臨風復整冠。鄉音憐過雁。古調拂離鸞。去矣歌招隱。終焉樂考槃。晚知交態薄。老識宦途難。

口腹非眞累。毋煩饋一簞。

入南城遇老醫言山陽舊事因成十六韻

邂逅山陽老。相傳事已訛。姦雄歸草莽。天地入悲歌。太守籌謀誤。將軍禮數苛。鞬囊同下吏。騶御失前珂。渙忍顏如此。憑陵事若何。比肩身肯辱。卻立齒爭磨。水捲寒雲甲。風揮白日戈。耳聞人作膽。眼見血成河。翁霍同么子。倉皇類小幡。官軍奔及馬。婦女走乘騾。自古儒冠忤。難將杯酒和。功成真草草。先公在宥府論山陽事去國後維揚論。將有北征時遺屯迷鼉石。鄧艾所築舊浴暗龍渦。土沃村功。咸謂偶幸。時至復戰戰。漂母恩徒快。中郎詠未磨。

壽致政王侍郎八十二韻

壽俊標周士。儀刑望魯儒。輞川饒詠賦。璜水祕謀謨。壯歲丰神整。明時臚仕殊。東曹誇鵲擊。公府羨鳬趨。審象三韓使。含章四皓圖。長身昂野鶴。正色叱妖狐。誓墓文何早。傳家計豈迂。鄉稱三老舊。人說二難俱。舍並分桃塢。田開別芋區。水邊時避飲。月下屢噴扶。眼碧看山媚。鬚銀映雪壺。油車懸蹠蹠。野服綴襦綸。社肉時相餽。春醪不用沽。綵衣新稚子。椎髻古奚奴。鼓擊深深舞。茶烹緩緩呼。花飛迷去路。鳥下避行廚。南極珠分瑞。東泉斗借麴。造朝看賜杖。入里記垂弧。翠柏根如石。靈龜息自腴。從今躋壽域。底用詫康衢。

壽牟獻之大理卿七十三韻

氣壘岷山秀。風神閬苑仙。西州餘故老。南國挺眞賢。瑞靄垂弧日。人思衣繡年。清門開耄慶。綠籍紀齡延。

止息功參易。虛心體合玄。厖眉垂素手。漆髮換華顛。今歲七十眉間忽生兩毫髮重黑鳩杖何期賜。牛車不待懸。三鱣傳素緒。一鶴記青氈。粉社爭爲壽。蘭墀數擊鮮。風騶追廣莫。雲珮憶鈞天。往事清霜木。希音太古絃。五更尊禮絕。六老舊堂專。所居正六老堂遺址杞菊調羹鼎。丹砂養井泉。慵書乞米帖。羞辦買山錢。醉劇簪花舞。遊疲枕石眠。黃公終慕隱。白傅且逃禪。文物傳青史。耆英入繪編。弁山寒戢戢。茗水響娟娟。望海傾朝夕。瞻星候次躔。登龍身未武。執雉意空傳。偈人徒多恨。低遠祗自纏。窮鄉真坐井。陋室強懷鉛。夜月思延桂。秋風學詠荃。終然羞弱植。復爾滯孤騫。問字瓶空在。傳經席未前。牛衣期振拔。馬磨費評詮。冰柱垂青嶂。蟻珠湛碧淵。至言機已息。妙技日無全。凡質丹須換。精誠溜合穿。遡風輸善頌。立雪冀敷宣。

壽李承旨四十韻

寶曆開三禩。瓊章集萬神。蒼龍迴插子。玉兔候交辰。潞水丹騰渚。壺關氣接旻。道傳莘野止。學比傅巖醇。帝運昌文統。師臣秉國鈞。清宮高贊畫。潛邸舊經綸。意得超今古。才雄異等倫。春浮霞錯落。秋映玉嶙峋。三執中書柄。重開大國鈞。黃鍾陽脈脈。瑤圃霧氤氲。仙鼎神膏祕。宮壺掌露真。恩醲錫麟脯。味薄謝猩脣。瞻碧光流漆。顏紅色耀銀。垂紳凝泰嶽。設席陋平津。手挈重華古。心追貞觀新。至人專上壽。八表樂同仁。非虎耆年竝。猶龍祖譜親。息深忘蜨化。機靜狎鷗馴。蕩蕩心無競。肫肫俗易淳。極知調鼎餽。不惜汗車茵。竹帛千年事。桑麻萬里春。管商謀可鄙。房杜跡常遵。斟酌扶元氣。彌縫護國珍。倚風憐竹弱。聽雪喜松皴。玉署親裁詔。青蒲獨奉宸。蜀江移戍罷。浙土減租勻。楊淨唯烏几。堂虛且角巾。手揮廷下吏。目送幕中賓。

習隱時思許。題詩尙憶秦。黍田溪溜溜。花塢澗鄰鄰。問俗停車緩。貪賢倒屣頻。藥囊儲赤箭。水鑑徹青蘋。蒼海收毫末。空林絕隱淪。籍功文館定。約法論堂詢。出處關吾道。安危佩一身。政須陳蹇蹇。直與紀麟麟。績藝慙班馬。抽才頌甫申。占天徒有管。望治眇無垠。閱歲桃成實。知年海拂塵。扶疎慙小草。葱蒨託靈椿。

送文子方著作受交趾使于武昌長律二十韻

萬里蠻陬貢。清秋督使馳。乘車專述命。受幣聽陳辭。紫舌音聲狡。雕題聚族滋。玉門心愈遜。銅柱約難移。江漢尊南服。星辰拱太儀。趨庭輸齒革。授館列膏脂。私覲情鈎隱。公言理折疵。彈丸空有險。束矢定無疑。桂蠹消煩滯。蒼龜審事宜。要荒工跌宕。保障慎羈縻。鸚鵡寒汀遠。蒹葭晚岸欹。壯遊詩句豁。古戍角聲悲。月矗朱簾正。山低翠浪欺。班超空耿耿。陸賈政怡怡。楚水愁腸結。衡峯望眼眇。過門王事急。去魯驛程遲。緬想垂衣治。深求補袞資。大夫謀可利。小客禮須持。諭蜀徒煩檄。平南漫擬碑。佇看王會傳。端假史臣爲。

魯子輦御史分按遼陽作長律五十韻愛其精密子今歲亦扈蹕開平因次其韻

象御天街正。烏輪海觀昇。省方秋戒慎。扈蹕歲因仍。石迸根駢拇。山迴勢左肱。塵深疑帽重。霧密覺衣蒸。午頓炊難熟。宵征酒易勝。解鞍心惘惘。執轡念兢兢。酪水分罍缶。通薪算斗升。皮毛均製服。脂腠或然燈。統幕迷高下。烽臺閱廢興。度關泉水咽。出口月華澄。狼戾官芻峙。魚麗餽粟徵。千房雲疊疊。萬竈墨層層。列帳排衣甲。行營護棘矜。旆旋環似翼。鼓發去如繩。斗北瞻紅棧。雲西指白登。草肥青穠稔。松聳翠峻嶒。積雪疑忘象。搏風訝徙鵬。屬車攢幄帳。行殿儼茵憑。白氍時逢賈。朱衣定指僧。翠旄逼華蓋。金甕耀觚棱。

觀闕天經界。儀臺象緯凭。伏飛拳似虎。鐵杖足如能。竹帛司常煥。丹青職貢增。會朝珠帽簇。錫宴寶卮凝。
陞立齊垂橐。師行陋釋棚。廣寒通月窟。高爽寄涼楹。上聖英資異。丁年武德弘。天戈中夜渡。星檄百川承。
同軌嚴行夏。明禋恥用鄩。別州端首冀。分器定先滕。德啟無疆服。光傳有道曾。皇威宣絕漠。陽澤散堅冰。
表正辰居所。漸仁水集塍。庭開下鳴鳳。苑廢罷飛鷹。舉逸尊加璧。掄才鄙販繒。鄧林搜八柱。瀛海取三淩。
曲學慙繩祖。孤聞賴得朋。沈思雲外弋。冥索澤中罾。客議雞同鶴。人疑驥聚蠅。濡毫終有思。執簡豈無懲。
謂可兼遐邇。胡云立愛憎。清芬蘭佩結。芳薦蕙殺烝。鴻筆吾誠忝。輜軒子累乘。共知心耿耿。相對髮鬢鬢。
馬磨誰憐許。龍門共企膺。枚生詞過實。揚子德徒稱。盛化乾坤闢。王綱日月恆。麟符昭炳蔚。豹霧駭超騰。
虛白難爲繪。空青不受矚。欲追千古筆。爲付一枝藤。

王趙公八十應制十韻

耆德膺熙洽。皇風協泰和。公明旁作稷。帝念紱惟歌。粉社新封土。蓬壺舊隱窩。黃公資輔翼。白傅退婆娑。
望日靈龜息。擎雲古柏柯。精神霞爛爛。儀觀玉峨峨。設醴樽浮蟻。兼珍釜錫馳。擁牀爭置笏。立馬會鳴珂。
服食丹藏井。絲綸錦簇窠。永須依日月。何必問煙蘿。

壽開府承旨十韻

泰嶽舒紅日。天門爛紫霞。氤氲生宰輔。磅礴贊亨嘉。文武揚中外。寬嚴接邇遐。遊嵩雲擁馭。度磧雪飛沙。
畫戟車流水。青編筆有花。精神春不老。器宇海無涯。玉殿彌綸重。金鑾密勿華。傳宣花似斗。錫宴棗如瓜。